

Вход 02.12.2023

Тропарь глас 4:

Правило веры и образ кротости,/ воздержания учителя/ яви ты стаду
твоему/ Яже вещей Истина./ Сего ради стяжал еси смирением высокая,/
нищетою богатая,/ отче священноначальниче Николае,/ моли Христа
Бога, // спастися душам нашим.

Тропарь глас 4:

Духа Святаго благодать стяжав,/ богомудре святителю Филарете,/ истину и
правду разумом просвещенным/ людем проповедал еси,/ мир и милость
сердцем умиленным/ страждущим явил еси,/ яко учитель веры и страж
неусыпный/ паству российскую жезлом правости сохранил еси./ Сего ради
ко Христу Богу дерзновение имея,/ моли даровати Церкви утверждение, // и
душам нашим спасение.

Кондак, глас 3:

В Мирех, святе, священнодействитель показался еси,/ Христово бо,
преподобне, Евангелие исполнив,/ положил еси душу твою о людех твоих/
и спасл еси неповинныя от смерти./ Сего ради освятился еси, // яко великий
таинник Божия благодати.

Слава

Кондак, глас 2:

Яко истинный подражатель преподобнаго Сергия,/ добродетель измлада
возлюбил еси,/ богоблаженне Филарете./ Яко пастырь праведный и
исповедник непорочный,/ по святем преставлении/ от безбожных
поругание и поношения приял еси,/ Бог же знаменьями и чудесы ты
прослави // и заступника Церкви нашея яви.

и ныне

Кондак, глас 6:

Предстательство христиан непостыдное, / ходатайство ко Творцу
непреложное, / не презри грешных молений гласы, / но предвари, яко
Благая, на помощь нас, верно зовущих Ти: / ускори на молитву и потщися
на умоление, / предстательствующи присно, Богородице, чтущих Тя.

Прокимен, глас 1: Уста моя возглаголют премудрость, // и поучение
сердца моего разум.

Ин Прокимен, глас 8: Веселитесь о Господе, / и радуйтесь, праведнии.

Причастен: В память вечную будет праведник, от слуха зла не убоится.

Ин Причастен: Радуйтесь, праведнии, о Господе, правым подобает
похвала.